

Ny Valosoa sy hadihady

Lotoina amin'ny kajikajy politika koa ny fampianarana

Raha misy olom-pirenena sarotiny amin'ny fahadiovan'ny seha-pampianarana dia tokony ho taitra avokoa tamin'ny zava-nitranga tamin'ny herinandro lasa iny. Nolotoin'ny fitondram-panjakana indray mantsy ity seha-pampianarana efa rakotry ny olana ity, tamin'ny fampidirana resaka politika. Efa tsy hita aza izay andraràna ny fitondrana amin'ny fana-sàna ny sain'ny mpianatra amin'ny resaka politika amin'ny fanapahana ny fianaran'izy ireo, ka terena hanatrika lanonam-panjakana samihafa tamin'ny toerana samihafa. Nisy teto tato anatin'izao fitondrana Rajoelina izao izany. Izao indray vao tamin'ny herinandro lasa iny, ny ministry ny fanabeazam-pirenena mihitsy teny Andohatapenaka no nampiditra resaka politika amin'ny sehatry ny fanabeazana. Amin'izay indray, ireo mpampianatra Fram vao nampidirina ho mpiasam-panjakana no anaovana karazan'ny fanerena ambadika mba hifidy an-dRajoelina amin'ny fifidianana. Fandotoana ny seha-pampianarana tsotra izao ireny nataony ireny, izay niaraha-nandre tsara tamin'ny fampitam-baovao haino aman-jery. Manimba ny seha-pampianarana sy ny fanabeazana ny fampidirana resaka politika na dia kely fotsiny, eny na dia atao ankolaka aza ny filazana azy. Niaraha-nahita tsara ihany koa, ohatra, ny nanjo ny sehatry ny baolina kitra tamin'ny Barea, vao nidiran'ny politikan-dRajoelina. lo resaka kajikajy politika ataon'ny olon'ny fitondrana

Rajoelina io amin'ny sehatra samihafa atrehiny, toy iny lafiny fanabeazana iny, no mahatonga ny firenena ho tonga amin'izao toerana misy azy izao. Firenena sy vahoaka fadiranovana mena-mitaha amin'ny firenen-kafa no misy. Mazava ny ohatra nataon'ny Banky iraisam-pirenena ny amin'ny fampitahana ny fandrosoan'i Madagasikara miohatra amin'ny fihazakazahan'ny fandrosoan'i Rwanda tarihin'i Paul Kagame, ilay hoe: afaka 70 taona vao hahatratra amin'ny misy an'i Rwanda ankehitriny i Madagasikara. Afaka izany taona izany, tsy efa lasa lavitra dia lavitra indray ny olona? Mpitondra tsy tonga saina amin'ireny teny ireny, efa tsy hay intsony izay ilazana azy. Lotoina amin'ny resaka politika sy kajikajy politika ihazonana seza izay atao rehetra. Mazava loatra, tsy hahavonona ny firenena izany ary tsy hampisandratra azy velively. Mbola sahiran-tsaina aza ny maro amin'izay hitranga eto amin'ity firenena ity amin'ny resaka fifidianana, izay hotanterahina eto manoloana ny toejavamisy amin'ny fikarakarana sy ny fanomanana izany.

Ity fitondrana Rajoelina ity dia mpiziriziry amin'ny heviny na dia iaraham-hahita izao aza fa hevi-diso. Ny fomba fitantanana toy izany anefa dia mitondra ny firenena mankany amin'ny fikorosy fahana, dia izao iaraham-hahita tsara sy iaraham-miaina izao ny vokany.

Sôh'son

FIFIDIANANA

Tokony hatao amin'ity taona ity, vonona ny CENI hoy ny filohany

Tokony hatao amin'ity taona ity ny fifidianana filohampirenena eto amintsika, azo lazaina ho efa vonona ho amin'izany ny CENI : vaomieram-pirenena mahaleotena misahana ny fifidianana, hoy ny filohany Dama Andrianarisedo. Nanamafy izany ny tenany ny faran'ny herinandro teo teny amin'ny foiben-toerany Ivandry. Azo lazaina ho efa hahafahana hiatrika izany ny lisi-pifidianana, vonona ara-tsaina ho amin'izany koa ity rafitra mpikarakara sy mpanomana fifidianana ity, ny vana'ny daty hanatanterahana izany rahateo efa navoakan'izy ireo : ny 9 novambra ny fihodinana voalohany amin'ny fifidianana filohampirenena ary ny 20 desambra 2023 ny fihodinana faha-2. Na eo aza ny indro kely arabola, sy ny mbola tsy amoahan'ny gouvernanta ny didim-panjakana manaika ny mpifidy hanefa ny adidiny, azo lazaina ho vonona hisedra ny hanaovana izany fifidianana izany ny eny Alarobia. Ny mpamatsy vola ihany koa misy amin'izay ny nilaza fa hanohana ara-bola, handrotsaka ao amin'ny « basket fund », hanohanana ny fanaovana izany fifidianana izany, ny faran'ny herinandro teo no nilaza ny fahavononany ny Frantsay, heverina fa hanao izany avokoa amin'izay ireo mpiara-miombon'antoka sy mpamatsy vola



Ireo avy amin'ny biraon'ny CENI.

hafa. Ankoatr'izany, notontosaina ny zoma teo, tety amin'ny foiben'ny Vaomieram-pirenena Mahaleotena Misahana ny Fifidianana (CENI), ny famelabelarana ny valin'ny fitsirihana ny lisitry ny mpifidy (audit du fichier electoral), izay nataon'ireo manam-pahaizana malagasy avy amin'ny Antoko politika : Tiako i Madagasikara (TIM), sy avy amin'ny firaisamonim-pirenena : Hetsika Fampiraisana Kristiana ho an'ny Firenena (HFKF), teo anatrehan'ny Comité ad'hoc, ahitana solontenan'ny firaisamonimpirenena sy ny mpanao Politika, ny Biraoh maharitra ny CENI, sy ny Tonia mpanantantarakara. Izao fitsirihana izao no natao, mba hisian'ny fifampitokisana ka hanaana lisitry ny mpifidy azo antoka hampisy fitoniant-saina. Miisa 10.678.852 ny olom-

pirenena voarakitra ao amin'ny fitahirizana ny antontan'isa eo anivon'ny CENI hatramin'ny faha 05 ny volana jona, ka 57.012 no nahitana tsy fahatomombonana mbola hitondrana fanitsiana. Miisa 29.144 ny anarana ahiana ho niverimberina (mitovy ny laharan'ny karanpanondro, anarana sy fanampiny, daty nahaterahana, ray sy reny) izay mety ho vokatry ny fifindra-monina na antony hafa, ka hitondrana fanamarihana sy fanitsiana. Efa voarain'ny CENI avokoa ny tolo-kevitra (recommandations) samihafa avy amin'ny mpitsirika ary misy ny efa notanterahina avy hatrany ny fanitsiana, indrindra ny mahakasika ireo fomba fanamafisana ny fitahirizana ny antontan'isa (protection et sécurisation de la base des données). Ampahany ihany ity fitsirihana notontosaina ity, fa mbola hanara-maso ny

fanatanterahana ireo so-sokevitra ireo ny mpitsirika. Nanambara ireo mpisehatra amin'ny fifidianana nanatrika ny famelabelarana, fa nanala ny ahiahin'izy ireo ny valin'ny fitsirihana izay natao. Nofaranana teny anivon'ny Disitrika tamin'ny faha-10 ny volana jona ny lisitry ny mpifidy ary mbola haverina eny anivon'ny Fokontany hanaovan'ny olompirenena fanamarihana ary manana 20 andro ny olompirenena tsy mbola tafiditra hisorantana anarana aorian'ny fampahafantarana izany lisitra izany eny anivon'ny Fokontany. Hisy ny fihonana amin'ny mpanao Gazety hataon'ny CENI, hitondrana fanazavana mahakasika ny antsipiriany anio talata 13 jona amin'ny 10 ora maraina eny amin'ny foiben'ny CENI Alarobia.

Isambilo

Antso Fiarahamonina Kristiana (AFK)
Tsy avela ho potika sy ho rendrika ny firenena

Tsy misy olom-pirenena velively izay mikasa hanao hetsika fanehoan-kevitra momba ny fiainam-pirenena sy ny zava-misy iainan'ny vahoaka, ka hihevitra izay hahapotika sy tsy hampandroso ity firenena ity. Fa ny tanjon'izy ireny dia izay hahatsara sy hahasoa ny firenena sy ho fitsinjovana ny hoavin'ny taranaka any aoriana. Ny olana sy manahirana anefa ankehitriny, izay manao izany dia iharan'ny sakantsakana amin'ny endriny maro samihafa na mivantana na ankolaka. Indraindray aza mifara amin'ny fisamborana sy fampidirana am-ponja mihitsy. Hoentina ho aiza ary hitotra mankaiza ity firenena ity?

Niha- nahazo vahana teto amin'ny firenena ny endri-paharatsiana maro samihafa ary tonga hatrany amin'ny habibiana mihitsy. Tsy midika ve izany fa misoka ao anaty haizina miandalana ny firenena? Misy ny manao ohatra ny mitranga eto amin'ny firenena amin'ny fanoharana ny nitranga tamin'ilay sambo lehibe Titanic izay nidona tamin'ny bolongan-dranomandry lehibe ny taona 1912. Ny vokany nitriatra ny sambo ary ny niaràny vaky sy nilentika mihitsy ary nahafaty olona hatrany amin'ny manodidina ny 1500. Tsy avy dia nilentika ilay sambo, fa niandalana ny faharendrehany. Sanatriavina, tsy ho tonga amin'ny toy izany ny firenena. Rehefa mijery ny zava-misy eto amin'ny firenena ankehitriny anefa dia sahirana ihany ny sain'ny olompirenena saropiaro amin'ity firenena ity, noho ny fitiavany ny tanindrazany. Manjaka ny fahalovana toy ny kolikoly sy ny tsy fahatomombanana maro samihafa. Voahitsakitsaka ny rariny sy ny hitsiny ary indrindra ny fahamarinana. Mitaky fanovàna lasijika na lasintsaina lalina izany eo amin'ny mpiray firenena manantolo. Manao ezaka amin'izany ny vondron'ny kristiana resy lahatra ny amin'ny tsy fetezany mitazam-potsiny intsony, fa tsy maintsy mandray andraikitra eo anivon'ny fiaraha-monina. Anisan'izany ny Vovonana Antso Fiarahamonina Kristiana (AFK), izay manao ho adidy lehibe amin'ny fanatanterahana ny Vinan'Andriamanitra ho an'ny firenena, dia ny hisandratany izany. Efa aman-taonany maro no nisian'izany, fa isika no tsy nihaino Azy, hoy ny AFK. Fotoanany araka izany izao, fa tsy avela ho potika ny firenena. Ny hany andrasany, dia ny fijoroan'ny olom-pirenena ho sahy hitondra ny anjara birikiny, ka hiara-hientana aminy. Fifandraisana : 034 17 460 53.

Aris

Tomponkala

Haninona ao frantsa indray ?

Heno fa nandadilady hihazo an'i Frantsa indray ilay tompondaka mampihomehy , malaza be any aminay. Inoana fa hangata-bola sy hitady fanohanana, izay no tena foto-diany mialoha ny fifidianana !

Sady heveriny ihany koa fa hampisandratra azy indray, Ny fihonany amin'ny ngezalahy toy ny filoha frantsay, Ka indro dodona sy maika ity ilay tia mirehareha, Fa efa tena mahatsiaro ho tapi-dalana haleha !

Be no tezitra avy hatrany raha vao nahare izany. « Angaha i Madagasikara haverina ho zanatany, No dia ao Frantsa indray i Tompondaka no handady, Angaha tsy nahavaha olana ny nisondrotany girady ? »

Sao ny «nosy manodidina » no tetehiny hamidy Sy hahazoana vola betsaka hanambazana mpifidy ? Sa dia inona indray no tetikady izay ketrehina, Noho ity ilay « sambo foza » eo an-dalam-pilentehana ?

Raha vao Lafrantsa mantsy no kasaina hiantampazana, Dia efa maro ireo vahoaka no indro fa mihidy vazana, Fa miverina ao an-tsainy irony androm-panjanahana, Nanagiazana ny gasy tsy mba hanam-pahafahana !

...Ka dia asa i Tompondaka raha hamitsoka indray Sy sahy hiteny hoe Lafrantsa no indro nandohalianay, Hamatsy vola eto amintsika sady hanampy ny eo an-tanana, Fa raha tsy izany tsy azo antoka ny hisian'ny fifidianana !

TSIMIMALO (11-06-23)